



**Akcija "Jezero"** Uhapšeni osumnjičeni za trgovinu bijelim robljem

## Kupili djevojčicu, a zatim je tjerali na prosjačenje

**BRČKO** - Policija Brčko distrikta juče je uhapsila Neđada Arapovića (41), Senadu Imširović (41), Suada Tahirovića (33) i Zlatka Beganovića (20) zbog sumnje da su trgovali maloljetnom djevojčicom, koja je bila prisiljena na život u vanbračnoj zajednici, ali i na prisilni rad i prosjačenje!

Kako saznaje Press, žrtva trgovine bijelim robljem bila je maloljetna kćerka Suada Tahirovića, koju je otac prodao Arapoviću i Imširovićevoj kao da je riječ o nekom predmetu ili robi. Nakon toga, Arapović i Imširovićeva djevojčicu su prisiljavali da živi u vanbračnoj zajednici sa Beganovićem. Međutim, mukama djevojčice tu nije bio kraj jer je nakon toga bila prisiljena da prosjači po okolnim gradovima, a "zaradeni" novac predavala je osumnjičenima. Grupa je uhapšena u okviru operativne akcije "Jezero", koju su, po nalogu Tužilaštva Brčko distrikta, sproveli istražioici SIPA i brčanska policija.



**PRISILJENA NA ŽIVOT U VANBRAČNOJ ZAJEDNICI** Policija Brčko distrikta

- U okviru akcije slobode su lišena četiri lica sa područja Brčkog i Tuzle. Radi se o licima s inicijalima N. A. (41), S. I. (41) i S. T. (33), koja su privedena zbog postojanja osnova sumnje da su počinila krivično djelo trgovina ljudima, kao i Z. B. (20), koji se dovodi u vezu s izvršenjem krivičnog djela "vanbračna zajednica sa mladim maloljetnikom" - rekao je portparol brčanske

policije Halid Emkić.

Osumnjičeni su juče privedeni u prostorije SIPA u Tuzli i policijsku stanicu u Brčkom na daljnju kriminalističku obradu. Nakon toga, tužilaštvo će odlučiti o eventualnoj mjeri pritvora. U policiji nisu mogli da otkrivaju detalje slučaja, navodeći da će daljnjom istragom biti utvrđeno za koji iznos je maloljetnica prodana i na šta je sve bila prisiljavana. **O.M.**